

**SEVENTH LEGISLATIVE ASSEMBLY OF MIZORAM
(TENTH SESSION)**

LIST OF BUSINESS

FOR SECOND SITTING ON WEDNESDAY, THE 31st AUGUST,
2016

(Time 10:30 A.M. to 1:00 P.M. and 2:00 P.M. to 4:00 P.M.)

LAYING OF PAPERS

1. **Pu R. LALZIRLIANA, Minister** to lay on the Table of the House a copy of "The Twenty Fourth Annual Report 2014-2015 of Mizoram Public Service Commission."
2. **Pu LALSAWTA, Minister** to lay on the Table of the House a copy each of the following :-
 - i) The Mizoram Entry Tax Rules, 2015.
 - ii) Report of the Comptroller and Auditor General of India on General, Social, Economic, Revenue and Economic (PSUs) Sectors for the year ended 31 March 2015.
 - iii) Annual Technical Inspection Report on Rural Local Bodies and Urban Local Body for the year ended 31 March 2015.
3. **Pu N.K. CHAKMA, Chairman** to lay on the Table of the House a copy of Statement on Actions Taken by the Government against Committee on Public Undertakings further recommendations contained in the Fourth Report, 2016 relating to Zoram Industrial Development Corporation (ZIDCO) for the year 2007-2008 and 2008-2009 under Industries Department.

PRESENTATION OF REPORTS

4. **Pu N.K. CHAKMA, Chairman** to present to the House the following Reports of Committee on Public Undertakings :-
 - i) Fifth Report on Action Taken by the Government on the Recommendations contained in the Second Report of Committee on Public Undertakings on the Report of

C&AG of India for the year 2007-2008 relating to Zoram Industrial Development Corporation (ZIDCO) under Commerce and Industries Department.

- ii) Sixth Report on Action Taken by the Government on the Recommendations contained in the Third Report of Committee on Public Undertakings on the Report of C&AG of India for the year 2010-2011 relating Zoram Industrial Development Corporation (ZIDCO) under Commerce and Industries Department.

5. **ELECTIONS TO FINANCIAL COMMITTEES** to elect Members of the three Financial Committees

LEGISLATIVE BUSINESS

Bill for introduction, consideration and passing

6. **Pu JOHN ROTLUANGLIANA, Minister** to beg leave of the House to introduce “The Mizoram Motor Vehicles Taxation (Amendment) Bill, 2016”.

ALSO

to introduce the Bill

to move that the Bill be taken into consideration

AND

to move that the Bill be passed.

NGURTHANZUALA
Secretary

....

S P E A K E R : Thu ang ule. Inveng ula, rinnaah chuan ding nghet ula, intihuai ula, chak takin awm rawh u. In tih apiang chu hmangaiha tih ni vek rawh se.
I Korinth 16:13-14

Tunah kan tih turah kan kal nghal ang a. A hmasa berin kan Minister zahawm tak Pu R.Lalzirliana'n 'The Twenty Fourth Annual Report 2014-2015' hi House-ah rawn lay sela, i sawm ang.

Pu R.LALZIRLIANA, MINISTER : Mr.Speaker sir, I lay on the Table of the House a copy of "The Twenty Fourth Annual Report 2014-2015 of Mizoram Public Service Commission". Thank you , sir.

S P E A K E R : Awle, a copy kha member te hnenah sem ni se. Tunah chuan kan Minister zahawm tak Pu Lalsawta, Finance Minister-in heng thil pathum te hi House table ah rawn lay sela :-

- (i) The Mizoram Entry Tax Rules, 2015.
- (ii) Report of the Comptroller and Auditor General of India on General, Social , Economic Revenue and Economic (PSUS) Sectors for the year ended 31 March, 2015
- (iii) Annual Technical Inspection Report on Rural Local Bodies and Urban Local Body for the year ended 31st March, 2015.

Pu LALSAWTA, MINISTER : Mr. Speaker, with the recommendation of His Excellency, the Governor of Mizoram and with your permission, I laid the following Reports in respect of the Government of Mizoram on the Table of this august House –

- (i) The Mizoram Entry Tax Rules, 2015.
- (ii) Report of the Comptroller and Auditor General of India on General, Social, Economic, Revenue and Economic (PSUs) Sectors for the year ended 31 March, 2015.
- (iii) Annual Technical Inspection Report on Rural Local Bodies and Urban Local Body for the year ended 31 March, 2015.

Thank you sir.

S P E A K E R : A copy kha sem ni sela. Awle, tunah Pu N.K.Chakma, Chairman zahawm takin Action Taken by the Government against

Committee on Public Undertakings further recommendations contained in the Fourth Report, 2016 relating to Zoram Industrial Development Corporation (ZIDCO) for the year 2007-2008 and 2008-2009 under Industries Department hi House dawhkanah hian rawn lay sela, amah i sawm ang.

Pu NIHAR KANTI CHAKMA : Mr. Speaker sir, with your permission, I lay on the Table of the House a copy of Statement on Action Taken by the Government against Committee on Public Undertakings further recommendations contained in the Fourth Report, 2016 relating to Zoram Industrial Development Corporation (ZIDCO) for the year 2007-2008 and 2008-2009 under Industries Department. Thank you.

S P E A K E R : A copy kha member zahawm tak te hnenah sem ni se. Pu N.K.Chakma, Chairman zahawm tak bawkin Fifth Report on Action Taken by the Government leh Sixth Report on Action Taken by the Government on the Recommendations contained in the Third Report of the Committee, hemi te pahnih hi vawikhatah rawn report sela, amah i sawm leh ang.

Pu NIHAR KANTI CHAKMA : Pu Speaker, ka lawm e. Pu Speaker, i phalna leh House zahawm tak remtihna in –

- (i) Fifth Report on Action Taken by the Government on the Recommendations contained in the Second Report of Committee on Public Undertakings on the Report of C&AG of India for the year 2007-2008 relating to Zoram Industrial Development Corporation (ZIDCO) under Commerce and Industries Department.
- (ii) Sixth Report on Action Taken by the Government on the Recommendations contained in the Third Report of Committee on Public Undertakings on the Report of C&AG of India for the year 2010-2011 relating Zoram Industrial Development Corporation (ZIDCO) under Commerce and Industries Department report te hi ka rawn present e, ka lawm e.

S P E A K E R : A copy kha sem leh nise. Business dangah kan kal thei ta a. Niminah khan kan hriat angin Financial Committee pathumte tana inthlanna motion kha move a ni a. Kan tihdan pangngai angin inremsiamna a awm a. Committee tinte tan 7 aia tam nomination file an awm loh avangin a file te kha chuhtu awm lova puan an ni a. Chungte chu :-

Public Accounts Committee ah Pu Nihar Kanti Chakma MLA, Pu T. Sangkunga MLA, Pu Lalthanliana MLA, Dr. Ngurdingliana MLA,

Dr. K.Beichhua MLA, Pu R. Vanlalvena MLA leh Pu Lalruatkima MLA te hi PAC member atan thlan tlin an ni a.

Committee on Estimates – Pu J.H.Rothuama MLA, Pu P.C. Zoram Sangliana MLA, Pu K.Sangthuama MLA, Pu Lalrobiaka MLA, Pu John Siamkunga MLA, Pu Chalrosanga Ralte MLA leh Er. Lalrinawma MLA.

Committee on Public Undertakings – Pu Lalrinliana Sailo MLA, Pu R.L. Pianmawia MLA, Pu Vanlalzawma MLA, Pu S. Laldingliana MLA, Pi Vanlalawmpuii Chawngthu MLA. Hengte hi chuhtu awm lova thlan tlin an ni tih ka puang e. Chairman turte chu nakinah Speaker in appointment a rawn siam mai dawn a ni.

Tunah chuan Legislative Business ah kan kal tawh ang a. Kan Minister zahawm tak Pu John Rotluangliana'n "The Mizoram Motor Vehicles Taxation (Amendment) Bill, 2016" hi he House-ah introduce rawn dil sela, amah i lo sawm ang.

Pu JOHN ROTLUANGLIANA, MINISTER : Pu Speaker, "The Mizoram Motor Vehicles Taxation (Amendment) Bill, 2016 hi he House zahawm takah hian introduce ka rawn dil e.

S P E A K E R : Kan phal a a lawmawm e. Rawn introduce sela, sawiho turin rawn move nghal mai sela. Amah i sawm ang.

Pu JOHN ROTLUANGLIANA, MINISTER : Pu Speaker, "The Mizoram Motor Vehicles Taxation (Amendment) Bill, 2016 chu he House zahawm takah hian ka rawn introduce e.

Pu Speaker, he Bill kan rawn introduce nachhan hi a hmain Ordinance kan lo siam tawh a, chu Ordinance chu thla ruk chhung chauh a nung a. Chumi rual chuan House-ah thla ruk hma-in Bill ah putlul tur a nih angin kan rawn pulut a ni.

Tin, Pu Speaker, hemi "The Mizoram Vehicles Taxation (Amendment) Bill, 2015 hi July, 2015 ah khan he House zahawm takah hian putlul a lo ni tawh a. Chutah chuan lungual taka passed a ni a. Chumi ang chuan "The Mizoram Motor Vehicles Taxation (Amendment) Act, 2015 chu Official Gazette ah chhuahin February 8, 2016 ah khan hman tan a ni tawh a ni. Amaherawhchu, hetia kan han hman chhoh hian he "The Mizoram Motor Vehicles Taxation (Amendment) Bill ah hian kum 15 chhung commercial vehicle ten VAT pek hmaa 6% atangin tax pek tur tih a ni ta a.

Chu chu Lifetime Tax kan tih kha a ni. Chumi pe tur commercial vehicle te chu three wheeler kan tih, auto rickshaw te, taxi kan tihte leh maxi cab kan tih ho te hi an ni a. Ama'rawhchu, hetah hian vawikhata pek tlaka kum 15 atana pek kha Commercial Vehicle Joint Action Committee te hian, 'hei hi zawng vawi leh khata pek hi kan tlin lo ve, installment-a pek theih dan turin ruahmanna min siamsak rawh u,' tiin an rawn dil a. Tin, anmahni pawhin rawtna an rawn siam ta a. Chutiang rawtna an siam zulzui chuan hetah hian installment thuma pek theih turin ruahmanna siam a lo ni ta a. Tichuan, "The Mizoram Motor Vehicles Taxation (Amendment) Ordinance, 2016" hi Official Gazette-ah chhuahin, July, 2016 atang khan he Ordinance hi hman tan a lo ni ta a. Hetah hian kan Commercial Vehicle Joint Action Committee pawhin chanchinbu kaltlangte pawh khan lawmthu an rawn sawi hial nghe nghe a. Tichuan, Ordinance hi ka sawi tak ang khan thla ruk chung chauh a nun avang leh a karah session a lo tlak veleh a Bill-ah chan tir tur a nih angin vawiin ah hian "The Mizoram Motor Vehicles Taxation (Amendment) Bill, 2016" hi he House-ah hian min pass pui turin ka rawn pulut a ni e. Pu Speaker, ka lawm e.

S P E A K E R : Hei hi he House zahawm takin a passed tawh tlema rawn tih danglam hlekna a awm a, sawiho tehchiam ngai turah ka ngai lova, ama'rawhchu, engemaw zawh duh nei te, clarification nei te kan awm chuan, chumite tan chuan hun hawng lawk ila a tha ang e.

Pu K. SANGTHUAMA : Pu Speaker, hei hi tlem-a-zawng zawhna mai bakah han sawihona awm se a tha lo maw, hun kan ngah tho baw a? Sawiho lo chuan han ti dawn ila minute sawmhnih khatah kan tin mai dawn a ni. Chuvangin tlem-a-zawng sawihona a duh tan hawng ta la Pu Speaker, a tha lo maw tih kha ka'n sawi hmasa duh a ni.

S P E A K E R : Aw le, House ngaihndan kha a pawimawh ber a, sawiho chu kan remti tlang em? A nih leh sawiho ang u aw. Mi pakhat tan minute engzatnge kan tih ang? Sawi tur a tam tehchiam lo baw a minute 5 hi a tawh mai lawm ni? (Pu K. SANGTHUAMA : Pu Speaker, minute 10 kha ti ila, sawiho tur a tam loh leh kan bang hma tho ang a) Aw le, a nih leh minute 10 kher hman tum lo ila, khai le, sawihona i tan ang. A rawttu khan tan mai la.

Pu K. SANGTHUAMA : Pu Speaker, ka lawm e. Helaiah hian kan tax khawn dan hrim hrim hi central atanga kum 15 an rawn tih hi Pu Speaker, kei chu dik lova mi pawisa chhuhsakna niin ka ngai a. Motor kan han lei a, kum 15 nei hi chu ban phar teh u ti ila, vawiinah hian in awm vak ka ring lo. Kum 15 mahni motor tha taka hmang an awm lovang a, tin, tlan tir thei kan awm bawkin ka ring lova. 1984 vela Maruti car thar lo chhuak hmasa ber kha ka lei a, chu erawh chu Pu Speaker, ka hralh ve leh hnu khan kum 20 dawn khawlaiah a tlan niin ka hria a, thingtlangah ka hralh a.

Hemi kan hman pangngai ngawr ngawr hi chu kum 15 hi nei in awm chuan in awm zeuh zeuh ang a. Mahni ta te hi chu in neih ka ring bik lova, in hralh thovin ka ring a. Chuvangin, hei hi chu Central atang hian kan ti dik vakin ka hre lova. Dik lova mi pawisa chhuhsakna niin kei chu hei hi ka ngai hrim hrim a. Chuvang chuan, hei hi a tha lo tih kha han sawi ve hrim hrim ka'n duh a. Vawiinah kan ti danglam ang tihna pawh a ni chuang lova. Chuvangin, kan duh loh leh tha lo kan tih leh dik lo kan tih kha he House zahawm tak hi kan sawina hmun tur a nih avangin hei hi pakhatat chuan ka'n sawi chhuak duh a ni.

Tin, chulo lehah chuan, inang tlanga tih mai awm hi ania, inang tlang lovin in ti a, kan han ti leh thluah mai bawk a, a then kum 5, kum 10/15, hetah hian duhthlan chhoh theih te ania. Tin, a thenah chuan thla thum te, kum khat te, khatiang khan a lo ni ta a. Thla thum han tih pawh hi ka hrethiam vak lova, kum khat tih hi chu a la hriatthiam theih a. Hetianga bichilh deuha thla khat te emaw, thla hnih thla thum te te tax han pek hi a buaithlak em em a, a petu tan pawh. Kan ti a nih rau rau chuan Pu Speaker, kum khat te kha ni ta sela, thla thuma tax han in pek kha a buaithlak hle a, chuvangin kum khat te a nih leh ni ta law law sela. Hengte pawh hi kan rawt dan hi engeni, a then lungawi a, a then lungawi lohna hi a tam duh khawp mai a.

Pu Speaker, han sawi ta zel ila, motor kan intlan chhawk te pawh hi taxi chauh hi ti lovin, kan ti rau rau a nih chuan a zavai hian sorkar motor leh Chief Minister thlengin, MLA thlengin, kan zavaia motor hi intlan chhawk tir ta ila, thla khat chhung emaw, kar khat chhunga vawikhat din, thla khat chhunga vawi hnih khat din ringawt chu, kan din ni chuan Pu Speaker, taxi te kan hire ve mai ang chu, harsatna a awm lo hrim hrim hetiangte pawh hi.

Sumdawng motor chauha kan tih tir chuan, a dik chiahin mi an lungawilo thin a, buaina a awm a, a lo kal a, a dik lova. Chuvangin keimahni pawh hi kan in surrender a ngai ve a ni, hetiang chungchangah hi chuan. Hman atangin kei chu ka rilru tak tak inTaxi ngawr ngawr va mawhchhiat te hi dik ka ti thei ngai lova. Chuvangin, miin an eizawna, tha taka an eizawn ve na, mi rethei zawk in an eizawna, thla khata vawi 2/3, vawi 4/5 lai din tir a,duh duha nuam tawl thei hovina engatinge ni hnih khat chauh pawh kan tih ngam loh?

Chuvangin, hei hi kan sorkar hian ngun takin ngaihtuah ula, in ti rau rau, kan ti rau rau dawn a nih chuan a zavai hian in-tlan chhawk dan te ngaihtuah ta ila, chu chu a that ka ring Pu Speaker. Kha kha a kaihhnawih vek tho va, chuvangin nimiran kan House Leader zahawm tak pawhin Pu Speaker, i phalna dil lem lo khan arawn sawi tawp a, kei chu i phalna ka dil e, tunah hian. Chuvangin hei hi a inkaihhnawih vek a, waviina House-a kan sawi loh

chuan khawlaia sawi mai mai kha chu thil awmzia nei tehchiam a ni lova. Chuvangin, motor intlan chhawk chungchang pawh hian ngaihtuahna thar kan sorkar hian han hmang leh thei sela a that ka'n ring a, vawiinah hian ka'n sawi chhuak veleh a ni e.

Vawiina kan tax lak dan chungchang hrim hrimah hian kum 15 thlenga pe tur kan la awm ania tunah hian. Private motor zawng zawng, heng hian kum 15 kan la pe dawn a ni a, kum 15 thleng kha kan hmang dawn lem lo a ni, hman loh pek ringawt mai kha chu mipui vantlang hian association kan awm ve lova, complaint ngaihna vak a awm lova, kan sawi a kan sawi lungawi ve leh mai thin a. Chuvangin, vantlang association te hi han siam ve zawk tur emaw chu aw tih te pawh a awm rum rum thei ang a. Chuvangin, sawiselna a awm lo em alawm an ti a, Association awm lo hi chu han sawisel a, sorkar han nawr vak hi a tih hleihtheih lova, mimal hi chuan an sawisel tho mai, a dik chiah chuan Pu Speaker. Kum 15 hi chu a lutuk deuh lawm maw ni le, chumi a nih loh pawhin 15 an tih rau rau pawhin hetiang a kum 5-a pek a, kum 10- ah pek leh a, kum nga dan zela pek ve te hi chu hetah hi chuan tlahniam ve thei ila a tha ang a, an ti deuh a ni.

Chu chu Pu Speaker, vawiinah hian kan House zahawm tak hian hria ila, a then commercial vehicle te chu han thik chi ni lovah in ngai a ni maithei a, mahse motor theuh theuh a ni a, motor theuh theuh a nih kha chuan in hrut rual ta ila, kum nga-ah public pawh hi pek tir ni sela, kum nga dangah a la that chuan an pe leh mai ang a, kum sawm, kum sawm panga a lo nih chuan a la that chuan an pe leh mai ang a. Chutiang chuan hei hi nakinah a la tih danglam theih chuan, vawiinah kan ti danglam thei kherin ka ring chuang lova, ngaihtuahna thar Pu Speaker, sorkar hian han nei leh ula chuan mipui kan lungrual zawkin ka'n ring deuh hlek a. Vawiinah hian khang tawite kha han sawi ka'n duh ve a ni e, ka lawm e.

SPEAKER : Khai le, sawi zel rawh ule. Dr. K. Beichhua.

Dr. K. BEICHHUA : “The Mizoram Motor Vehicles Taxation (Amendment) Bill, 2016” kan Minister zahawm takin he House zahawm taka ngaihtuah ho tura a rawn chhawpchhuah hi a hmasa in lawmawm ka ti a.

He kan Bill amend tur ka ngaihtuah hian Pu Speaker, Mizoram Motor Vehicles Taxation (Amendment) Bill, 2016 hi nikum 2015 a kan passed pawh khan kei chuan tha ka ti lova, vawiin thleng hian kei chuan tha ka ti lova, tha ka tih theih hi ka ring lo a ni.

Chutihlai chuan Pu Speaker, vawiinah hian he Bill hi kan Minister zahawm takin amend a tul nachhan te pawh a rawn sawi tawh a. Amendment a

tulna a rawn sawiah khan tiang hian ngaihtuah ta ilar, pakhatna-ah chuan non-transport vehicle, private vehicle neitu ten sorkar hnena ngenna kan siam loh emaw, rawtna kan siam loh vanga life time tax min pek tir reng ringawt kha thil dik a ni dawn em ni tih min ngaihtuah tir a. Association angin kan ding ve bawk si lova, mahni mimal angin han sawi ta ilar, kan phun kan phun a, lungawilo chungin tax kan pe leh ringawt thin a. Chutihlai chuan commercial passenger vehicles ten Joint Association ang ten sorkar hnenah ngenna, lungawi lohna te pawh an thlen tih kan hria a. Khang lungawilohna thlentu te rawtna ang zulzui khan vawiinah hian he tax hi, he Bill hi amend a ni tih te pawh kan hria a ni.

Chutihlai chuan Pu Speaker, kan ram vehicle atana kum 15 life time tax kan han tih hi kan kalkawng nena han ngaihtuah chuan Mizorama thil inhmeh lo zinga inhmeh lo pawl tak niin ka hria. He House-a kan member zahawm tak tak te hian kan motor hi kum 15 a tlan lo tih hi a hrechiang ber bertu kan nih ka ring. Chuvangin, hei hi tuna amendment rawn siamah phei chuan one time tax tiin rawn siam a ni a, a hming chu life time tax tih ai chuan one time tax tih hi chu a mawi deuh hlekin ka hria a ni. A tir atang khan life time ti lovin, one time tax te kha tih ni ta sela chuan mipuiin kan rilrua kan perceive dan pawh hi kan perceive thiam deuh zawkin ka ring a, mahse one time tax leh life time tax kha danglamna a awm hran lo a ni tih a chiang a.

Ordinance hi ni 21.7.2016-a gazette ania, ni 20.1.2017 thleng a daih dawn a ni. Chutihlain vawiina he session emergency anga kan koh chhan zing ami a nih tel chuan a vanduaithlak ka ti a, vawikhat session neih hi sum nei lo sorkar tan chuan thil hautak deuh a ni. Chuvangin, hetiang emergency-a in koh hi a tul ber em tih te pawh min ngaihtuah tir a.

Tin, Pu Speaker, Amendment of Schedule I Principle Act in Group II, the description of motor vehicles, after the words motor vehicle and before the word “operating”. Operating tih lai hi Principle Act-ah a awm lo, ka hmu lo, Kan Minister zahawm takin min hrilhfiah se a lawmawm hle ang. Amendment of section 4(a) tih hi Principle Act-ah a awm lo. New insertion turin a theih dawn em ni? Schedule 111 hi a awm lo bawk. Heng zawng zawng hi Pu Speaker, Minister zahawm tak Bill amend tura rawn chhawp chhuaktu hian chiang takin House-ah hian min hrilhfiah se a lawmawm hle ang. Chutiang chuan he amendment vawiina kan rawn siamah hian mipui thliar hranna a awm deuh hlekin ka hria a. Private-a motor nei tam takte hi chu loan nena nei lo chung chungalei te kan ni a, life time tax kha one time tax anga pek tir bik tur kan ni lem em ni tih kha Pu Speaker, he House zahawm takah hian ka rawn sawi chhuak duh a. A theih chuan hei hi kan Minister zahawm tak hian ti danglam se, hrutruual vek se tih a pawimawh hlein ka hria. Pu Speaker, ka lawm e.

S P E A K E R : Sawi leh tur dang kan awm em? Aw Pu Rinawma

Er. LALRINAWMA : Pu Speaker, ka lawm e, session hmasaa kan han pass pawh khan 6% chu ‘ a to dawn mang e’ kan ti kan ti a, a to ta mai reng a. A lehlamah Mizos mipuite hi thil kan chiang lo nge ni, ka ngaihndan tak chuan khang kha pawn lama rawn rik deuh luh luh tlak niin ka hria a, mahse kan ngawi tlangin keini lam pawh khan kan pass ta dial kha a ni mai a. Kan han hmang a, a lo buaithlak viau mai a. Engpawhnise vawinah amendment te pawh a rawn kal a, mipuite tan remchan zawkna turin, a lawmawm khawpin ka hria a. Amaherawhchu, tah hian thil pakhat ka’n sawi ve duh lai chu hetilaia kan amendment bill pheik 4-na scheduled 2-a one time tax ah khan ‘At the time of registration of new vehicles’ tih a one time tax ah khan 6% kha kum 15 ah kan han ti phawt ta a. Two time tax-ah khan 4.2% kum 10 atan kan han ti leh ta phawt a, a piah leh three time-tax ah khan 2.2% kum 5 atan kan ti ta a. Kha kha han then hrang chho ta thliah thliah ila two time-tax ah kha chuan kum 5-ah khan 2.1% vel pe ang kan lo ni tihna a ni ta a. Tichuan 3 a kan puntir chuan za zela cheng 6 aia tam, za zela 6.3% kum 15 atan kan pe tihna ang a lo ni ta a ni. Tichuan three time tax ah hian 6.6%, kum 15 atan pe ang kan lo ni ve leh ta a. Tichuan kum 15 pe tla chu 6% ang an lo ni ta a. Hei hi mipuite lam pang, a rawn sawiseltute kan han tih, association te hian vawi khata pek tlak a harsa tih an sawi a, a pek dan hi instalment a tih theih dan a awm lawm ni tih an sawi laiin, a zat hi kan ti pung chho hret hret niin a lang a, hei mipui pawisa ti mai ila, khami an pek muan azarah chhiah hi kan lo ti pung ta mai nge ni tih lai kha min han hrilhfiah se a lawmawm khawpin ka’n ring a.

Tin, ka’n sawi belh duh lai chu replacement kan han ti dawn a, kum 10 vel a lo ni deuh tlangpui a, tuna kan motor ho leh bus ho te pawh hi. Amaherawhchu kum 15 atan chhiah kan han pek tir hlawm a, helaiah hian a pek kir dan kha chu awm tho mahse kum 15 chhiah kha kum 10 replacement kan ti leh si a, kum 5 atan pawisa kan lo lak lawk sak ang a lo ni a. Pawisa hi a kumkhat punna pawh a hlu chho em em a. Khati lai kara kum 5 vel bawr kan lo hren sak a, anni kum 10 a replacement ti tura kan ti leh si kha chu a fel hlel em aw tih lai kha vawinah hian kan sawi duh a, kan Minister zahawm tak pawh in min lo hriat sak se ka’n duh a. Ka hmaa kan member zahawm takte sawi ang khan road tax hi private-ah kum 15 min han tih sak a, hei hi chu ennawn pawh a tha ve tho lawm ni, association anga nawr nghah kher te hi a harsa a. Tin, vantlang association han din te pawh kha a rem tuai lo mai thei a. Amaherawhchu mimal tin te kan phunna hi min lo hriat sak sela, 6% chu rin aiin a tam duh ang reng phian mai a ni tih lai kha ka’n sawi duh a.

A dawt leh atan chuan motor intlan chhawk chungchang kha kei pawh han sawi ka duh a, vawinah hian a rem chiah lo mai thei a, Amaherawhchu Pu

Speaker, i phalna in helaiiah hian taxi lo pung hi kan han mawh deuh bik niin ka hria a, a leh lamah chuan sorkar kut thlakna tho a ni a, taxi permit pek te pawh. Chuvangin kan vaia min hrut rual tur hian a tih theih mai lawm ni tih lai kha ka'n sawi duh a. Entirnan, motor pahnih nei te kan lo awm chuan, duh leh motor number thlak kha min phalsak ve thung mai se. Helaiia tute emaw va tih bik a, tute emaw va tawrh tir bik kha chu a fello in ka hria a. Taxi permit pek hi sorkar kut thlakna a ni a, a mawh pawh kan phur ngam dawn lawm ni kan vai hian tih lai kha ka'n sawi duh a. Chuvangin tute emaw ti bik lovin, kan vai hian intlan chhawk ila, kan member zahawm takte sawi ang khan a tul chuan taxi pawh kan hmang ve mai ang a, public transport-ah kan kal ve mai ta lawng. Chuvang chuan helai hi chu inkhai rual zawka kan tih kha a tha awm mang e tih kha ka'n sawi duh a.

Tin, kum 15 chhiah lak hrim hrim chu motor hi a lo tawng chak khawp mai. Bolero hlui lampang hi ka nei ve a, kum 10-na a ni tawh a. Mi ta hlui kan lei chhawn a ni a, private-ah an hmang thin a, tunah hian kum 10 leh tih a ni tawh a, Mizoram chhung atang ringawt chuan a maintain hlei theih tawh loh niin ka hria a, a part hi Guwahati ah kan chah reng mai a a buaithlak khawp a. Chuvangin heng Maxi cab anga han hman te pheih hi chu a van tawng chak dawn e aw ka ti a, ka lo tawn ve atangin. Two wheeler ho pheih chu kum 15 a daih mawh khawpin ka ring. Tun laia scooty an khalh ho ang chi te pawh kum 4 kum 5 a vei chuan a chul sawlh sawlh tawh mai a ni. Chuvangin private-a kan hman kum 15 ni lo kum 10 liam pawh hi manganpui awm tak a nih avangin, kum 15 chhiah lak chu a tlangpui thu ah, kan motor hian a tlin lo deuh lo maw le tih lai kha rilru ah te pawh a awm a. Henglai te te hi mipuiten kan lo samkhai zawk nan han ennawn chhoh leh thin ni se chuan a tha awm mang e aw tih te pawh rilru ah a awm a. Engpawhnisela, vawiin kan bill hrim hrim hi chu mipuite chhawk zangkhai tur a nih avangin han pass hrim hrim kha chu a tha tih kan sawi duh a.

Tin, helaiia Aizawl Taxi Worker Union ho-in lehkha an siamah hian ti hian an rawn ziaak a, Pu Speaker, i phalna in ka lo chhiar ang e. "Life time tax lak dan hi a inkhuangruallo em em a, keini Taxi, Sumo leh Auto Rickshaw te kum 5, kum 10, kum 15 leh private kum 15 direct-a an lak laiin kan commercial vehicle pui dangte chu thla 3, kum chanve leh kum khat an la a. Hei hi rorelna lai lo leh thleibik na ah ngaiin" tih an rawn ziaak a. Hei pawh hi khairual a van tha em ve aw! A chhan chu thil engemaw a lo piang zel a, sumdawng motor an ni tlang vek si a tih lai te pawh kha ka'n sawi duh a. Chulai chu Pu Speaker, ka sawi theih ni teh se, ka lawm e.

S P E A K E R : Awle, tunge sawi leh ang? Pu Thanliana.

Pu LALTHANLIANA : Pu Speaker ka lawm e, thiante sawi tawh hnu kha chu ka sawi lo ang a, an sawi kai zeuh si mahse Chiang Chiah si lo, ngaih

pawimawh deuh ka neih a awm a. Replacement chungchang hi life time tax kum 15 pe tawh te kha an awm teuh mai a, khatah khan replacement hi kum 10 china tih tur tih a nih leh si avang hian khangho kha refund leh tur tihna em ni ang tih ka zawt duh deuh a. Helai Amendment Bill phok 5 ami hi a ni lo deuhin ka hre si a, hei hi chu registration cancelled te tan tih a ni deuhin ka hre si a. A refund theih chungchanga hi khami atana rawn siam nge a nih hei hi ka chiang chiah lova 'If cancellation of registration by surrender of registration certificate' tih a ni a. Hei hi a ni lo deuh hlekin ka hre si a, khalai kha ka'n chiang duh a, ka'n zawt pah a.

Tin, thil lai lo deuh hlek angin a hriat a, tuna ka hma ami sawi kha kan sawi leh duh chu, kan ti law law a nih chuan a zavai atan hian hrut rual mai hi a tha em aw tih kha ka ngaihtuahnaah a awm deuh bawh a, kei pawh commercial vehicle ho te tana zangkhai tak anga lang kum 5, kum 15 tum thum pek a pek tlak theih tura siamsak a nih laia a dang ho tana thla 3, thla 6, kum 1 han tih bik kha lai lo deuh ni khan a hriat a. Hei hi ngaihtuahnaah han awm leh se, nakin lamah te pawh tih kha kan sawi duh a. 'The Mizoram Motor Vehicles Taxation (Amendment) Bill' vawiina han put luh hrim hrim erawh hi chu a tha ka ti a, ka'n thlawp a ni e. Ka lawm e.

SPEAKER : Pu Lalruatkima i lo sawm ang.

Pu LALRUATKIMA : Pu Speaker, ka lawm e. Vawiinah 'The Mizoram Motor Vehicle Taxation (Amendment) Bill, 2016' Transport Minister changtu zahawm takin a rawn pulut hi a lawmawmin ka hria a. Chutihlai erawh chuan Pu Speaker, lawm a kim lo deuh em aw ka ti a, kan Rules-ah te, kan Constitution-ah te a awm a, ordinance hman theih a nih lai hian tun tumah hian ordinance-in an lo ti chhuak a, chu lai erawh chu Legislators te kan hlutna leh kan chanvo hi pal zutna ni te pawhin a lang thei a. He House zahawm takah hian kan hun chhung in ordinance hi tum hnih kan hmuhna a ni tawh a. Chuvangin a theih hram chuan ordinance tel lo hian he House zahawm takah hian kan dan te hi sawi hovin pawm tlang thei ila a tha in ka hria a, chung chu kan sawi hmasa ni se.

Chubakah chuan kan Minister zahawm tak khan lungrual takin kan passed a tih khan lungrual takin tih kha a'n thluk sang deuh a, nimin lamah pawh khan he dan bikah hian. A dikna chen a awm a, amaherawhchu, lungrual taka han tih ngawt theih kha a ni lo a, he dan hi a fel lo lai te leh mipui tana phurrit awm te kha kan hre tlang a. A bik takin tawng mawi lo ni suh se, a party ang zawng pawhin he dan hi ennawn a ngai a ni, siam that a ngai a ni tiin a duhlohna kawng hial te pawh kan zawh chhan zingah te pawh a tel a ni. Chu chu a chhan ber chu non-commercial vehicles te tan te, commercial vehicles atan te life time tax han lak hian kum 15 (sawm panga) chhung atan tiin kan han la a, chu chuan motor kan neih hun chhung, a dam rei hun chhung te a tlin loh bakah, commercial vehicles thenkhat, a bik takin auto rickshaw te,

khang ang chi tan khami kha an dam hun chhung kha ni theia a lan loh avang khan siam that hi a tul em em a ni. Kum 15 chhung atana tax han pek chu loan la a bul tan tute tan pheh chuan a na khawp mai a.

Tin, private tam tak te pawhin motor hi loan-in kan la a ni, kan lei a ni. Chung mi te tan pawh life time tax kum 15 atana kan han pek meuh chuan sum hi a chhuak kaw hawk mai a ni. Chuvangin kan Minister zahawm tak Amendment Bill rawn put luh ah hian kan hriat angin Pu Speaker, complain a awm loh avangin midang hi chu kan en tha lo ve tiin commercial vehicles thenkhatte tan one time tax te, two times tax te, three times tax te kan han ruahman a ni a. Chutah chuan kan ngaihthlak tawh ang khan, kan member zahawm tak ten an sawi ang khan, hetah hian commercial vehicles rau rauah pawh thenkhatin thla thum dana kan pek te, kum chanve leh kum khata kan pek theih lain taxi leh motor thenkhat, maxi cab kan han tih ang chi thenkhat tan khan tuna kan amendment turah hian kum nga atan, kum sawm atan, kum sawm panga atan option a rawn siam a ni. Khami te tan kha chuan a tha maithei. Amaherawhchu, midang te nena in khai rual lova kan han kal hi chu a fel lo theiin ka hria a, chulai kan han lawm rual rualin lawm a kim lo deuh e, a thenah ni a sa a, a thenah ruah a sur a nih ber hi a tih loh theih loh te pawhin ka hria a.

Tin, hemi piah lamah hian Pu Speaker, kum 15 atan life time tax kan han pe a, tun hnaiah State Transport Authority thuchhuah/thu rel kan lo hria a, chanchinbu lam atangin - replacement taxi atan kum 10, kum 10 an lo tlin chuan thla ruk chhungin a replace tur a ni, a replace loh chuan cancel a ni ang tih te. Tin, bus a ti tawp mai a, hetah hian bus kum 10 lo tling tawh chu thla riat hun an pe leh a, taxi-ah thla ruk a pe a, bus-ah thla riat a pe a, maxi cab-ah erawh chuan kum 9 a tlin tawh chuan tiin thla ruk a pe ve leh a ni. Heng anmahni replacement hun an siam te hi a inang lo zung a, tin, a dam hun chhung ti mai ang, hun a pek kha a thenah kum 10, a thenah kum 9 te a ni bawk a, chutiang te chu a ni a. Helai Taxation Amendment Bill kan sawiho naah hian Pu Speaker, hei nena in kaihhnawih a nih avangin chung te chu ka han sawi lang duh a, a in rual khaiin kan kal pui thei lo em ni? Thil reng reng a tuartute tan pawh a inang tlang deuh, a thena ni sa, a thena ruah sur lo khan kal pui tum kha a tha awm mang e aw ka ti a. A bik takin replacement-ah hian city bus tunah hian 261 an service mek a, 140 vel hi replacement tih ngai tur a ni dawn a ni. Chung mi te chu a then loan la rul zo lo te, mi ta hlui leia loan la rul mek te an ni a. MZ 01 C chin ho kha chu replacement tih ngai deuh vek an ni dawn a ni, a motor han en kha chuan a la tha viau si a, khang ang chi kha a ni a. Tunah pawh hian motor hlui, motor thar hlaka replacement kan hria a ni. Chasis thlak tura permit, phalna an pek, mahse motor thar hlaka an thlak te pawh kan hria a ni. Khatiing khan thil ti thei leh ti thei lo kha kan in ang lo zung mai a ni. Chung te chu a in khai rual thei em tih kha ka han sawi duh a.

Tin, heng bakah hian Pu Speaker, hemi in a concern tho, motor in a concern tho pakhatat chuan HSRP(High Security Registration Plate) kha thawk khat lai khan kan nghei der mai a ni. HSRP - (High Security Registration Plate) kha contrator te khan engti zai zia nge ni an rawn supply thei lo a, thla hnih dawn kha kan nghei a ni a. Chutah chuan Aizawl khawpuiah a tlan kual loh theih si lova, khang te kha tan kan lak lehzuah a ngai a, chutilochuan private firm atanga registration plate lo tih ngawt kha dan in a rem ti tawh si lova, chutiangte chu kan dinhmun tlangpui a ni. Chutichuan he amendment kan han sawiah pawh hian kan sawi ho tan hi chuan vawiina one time, two times, three times te tana chance kan han pe, kan han amend tur hi a lawmawm. Amaherawhchu, khami te thik tur kha midang an lo awm cheu mai erawh hi chu,tun hnu ah chuan dan hmaah hi chuan inang tlang thei se tih kha ka'n sawi duh a.Commercial Vehicles Association te pawhin harsatna, an lungawi lohna lan tirin, mipuite harsatna nasa tak an siam a nih kha. Khang te pawh kha thleng tawh lo se, uluk zawkin State Transport Authority-te pawh hian ngaihtuahna rawn hmang leh se tih hi ka sawi tel duh a. Chuvangin kan ram kan rethei a, harsa takin miin eizawn nan motor vehicles te an hmang a, chung mi te chuan loan la in bul an tan a, kum 5 chhung Pu Speaker, an loan rulh period a ni, amaherawhchu, khami bakah khan initial deposit ngai kha kum 5 dang vel kha la rulh leh, la hmuh chhuah leh kha a ngai a ni. Chutiang hunah chuan replacement kan tih kum 10 kha chu a tlem lutuk deuh em aw tih te ka ngaihtuahnaah chuan a awm a, chuvang chuan kum 10 aia tam en let leh theih ni se.

Tin, khang zawng zawng kan han sawiah khan Transport Department hian vehicles taxation chungchangah te pawh hian kan Minister zahawm tak hian a sawi a, all India-a passed a ni a ti a, a dik vek mai. Mahse Transport Development Council, Government of India meeting vawi 35-na thu tluakna a nih thu te statement-ah hian a sawi lang a. Chutihlai chuan, kan Transport Minister hmasa te kha chuan heng ang hi tih an tum pawhin kan dodal tang tang a tih te pawh kha sawi hi a awm thin a ni. Chutiang a nih chuan dodal lovin heng kum 15 life time tax tih ngawt te hi kan pawm ta mai nge, vote hmangin min hnehchhuh zawk tih te pawh kha ngaihtuah tham tak niin ka hria a. Chuvangin he Amendment Bill hi a that viau laiin a tha ziktluak lo deuh e tih te. Tin, kum 15 tana refund theihna tur schedule 3-a kan han siamah pawh khan kum 10 a tlin tawh hnu ah kha chuan , kum 10 atanga 11 chhung atan 28% kha a lo ni dawn a.

Chulaiah chuan kum 15 lo pe hman tawh taxi replacement emaw, bus replacement ang chi ho tan khan 8% kha refund tur a nih si chuan 100% - a kum 5 atanga han chhut khan an hlawk lo hret, sorkar an hlawk hret a ni. Kha pawisa kha kan invest hman si a tih kha ka ngaihtuahnaah chuan a awm a. Chuvangin khami te rilru nat lohna tur khan ngaihtuahna hi kan hmang thei

lawm ni tih kha he Amendment Bill chungchangah hian ka'n sawi lang ve duh a ni e. Ka lawm e.

Pu K. LALRINTHANGA : Pu Speaker, i dinglam atang hian an sawi duh lo em mai a. Chuvangin kan pawlh ve teh ang. Miin in a sak dawn chuan enkawl a ngai a ni tih an hria a. Chumi nihphung ang chuan chhungkaw pa berin ngaihtuahna te a siam a. Tuna kan dinhmunah hian motor lei te hi a lo awlsam ta em mai a. Chuvang chuan i veilam ami te hi an buai ta ni deuh berin ka hria a.

Hmanlaia Aizawla mihausa pahnih/pathum ten car an lei theih lai khan tunah chuan Aizawl veng hrang hrangah, sorkar hnathawk lian vak lem lo group 'C' amite pawh, mi tam takin car an nei thei ta a. Chutianga an neih theih chuan a enkawl na tur te pawh an in ngaihtuah thei tur a ni. A mamawh thil tul, car a neih avanga thil tul tam tak petrol a ngai dawn tih a hria a, sorkarin motor tlanna tur kalkawng a siam a, chutah chuan a tlan dawn chuan tax a pek a ngai a ni tih a inhre turah ka ngai a. Chutiang lo zawng a, a in vui pui ang zawnga hetia kan in sawi kan in sawi hi chu a thahnemngaih thlak lem loh in ka hria a, chu chu ka han tarlang duh a. I veilam atang khan, "tha lo ka ti," tih kan ngaithla a, tha tih chi chu a ni lem lova, mahse, "a tul a ni," tih erawh hi chu kan hriat a tha in ka hria.

Tax te hi kan lak loh chuan a free-a Mizoram kalkawng siam a harsat dan Chiang taka hre vektu kan ni. Tlangram a ni a, kan ram leilung a nghet lova, a siam a harsa a, kan lung a no a, kawng a tha rei thei lova. Chumi siamna atan chuan Mizoram budget atangin sum leh pai kan nei thei lova, central sorkar atangin department-in sum leh pai an zuk dil a. Chumi chu a changin awlsam deuh te pawhin pawisa an hmu mahna, a chang chuan harsa takin hun rei tak hnu ah te pawisa hmu in an siam tha thei tawh chauh a ni. Chutiangte a nih avang chuan tax lak hi, (motor kan nei a nih chuan tax lak hi) a tul a ni tih hi memberte chuan kan hre theuhin ka ring. Chu chu a hmasa in ka han sawi duh a.

Tin, ka sawi duh pakhat chu, ruang phurh nan pick-up ka lei a, chu pick-up chu private car angin a register theih tlat loh mai a. Inhlawhna tur atan ka lei lova, bial chhung mipuite, damlo leh mitthi-te a thlawna phurhna tur atan ka lei a, car angin ka hmang a ni. Car thenkhatte hi private-a register a, public-a mi phurhna tur atan te (taxi atan te) an register thei bawh a. Pick-up hi pick-up a nih avang ringawta private anga register theih loh hi a fel lo in ka hria a. Hemi tih theih dan hi chu zawng ve ta ila tha in ka hria a. Life time tax an tih ang te kha kei pawhin ka pe vek a ni, ka inhlawhtir miah lo, a inhlawh miah

lo. Mahse public anga register ngai tlat, thianten min rawn dil pawhin ka inhlawhtir ngai lo, a thlawn liau liaua mi phurhna tur a ni a. Inhlawh miah lova hman tur a nih avang khan car anga register ve theih kha ni se a tha in ka hria a, chu chu ka han sawi duh a ni.

In tlanchhawk chungchangah khan private te leh public motor te hi a in ang lova. Public motor theuh theuh pawh a in ang lo tih hi kan hriat tlan a tha in ka hria. Maxi cab te hi taxi te ang hian intlanchhawk turin ruahman ve ta ila, thingtlang khaw thenkhat chuan Aizawl kalna tur te leh hmun danga kalna turte kha an nei lo fo dawn a ni tih hi hriatchian sak ila tha in ka hria a.

Tin, chutih rual chuan car te pawh hi nitin (nakinah in duh chuan sawi ve mai rawh u, ka sawi chung chuan min lo tibuai rih lo rawh u) an tlan chhuak vek lo. Sorkar term hmasaa Assemblyin motor min leisak kha ka la nei reng a, a chang changin a battery tihnun that nan ka tlan chhuah tir chauh a ni. In tlan chhawk ve kher a ngai lo. Khatiang khan car zawng zawng hi nitin an tlan chhuak lo tih hi hriat tur a ni a. Taxi thung erawh hi chu nitin inhlawh a ngai, chuvang chuan ang khata en tur pawh a ni lem lo tih hi kan hriat a ngaiin ka hria a, chuvang chuan ka han sawi duh a ni. Kum 15 hi a rei lutuk tih te a ni a, kum 1997 khan Gypsy King ka lei a, tunah hian kan nau pakhatin min rawn chhuhsak a, 'huan kal nan, kawngchhia-a kalna tur atan ka duh', a ti a. A tlan fo a, tha takin tunah a la enkawl a ni, kum 20 tlinna turin kum 1 chauh a ni tawh. Kum 15 chu tha takin a dam a ni. 1998 leh 2003 inkar khan km 1,20,000 a tlan tih hi kan hriat a tha a, tha takin mahni motor chu enkawla tlantir tur a ni a. Mi thenkhat taxi a car hmang te hi driver thenkhat ten dim lo baksaka hmang hi an awm thin a ni. Kawng chhe pui puia taxi te hi chu ama motor a ni lo ang a tih hial tur khawp-a lo ding hi hmuh tur a awm thin. Chutiange a nih avang chuan chung motor dim lo ho chuan motor an tichhe hma a, kum 15 hi chu a dam thei a ni tih chiang takin ka hria, chu chu ka sawi duh a. Engpawhnisela, thenkhat tan erawh thung chuan kum 15 tha takin an enkawl thei lo te pawh a ni thei e tih kha kan sawi duh a ni. Chutiange te te ngaihtuah chuan motor kan hman, kan lei te hi tax a ngai a nih chuan tax pek kan inpuahchah ve tur a ni.

Taxi tunhmaa lo lei tawhte tan khan vawikhat-a pek te, vawihnih-a pek te, vawithum-a pek tur te in vawiinah hian ruahman a ni a, hei hi chu lawmpui mai ila, sawisel sawisel lo ila. Lei thar tur tan chuan motor kan lei dawna thil tul ang kha hria in, khatiang tur khan kan inpuahchah tur a ni tih hi ka han tarlang ve duh a ni. Ka lawm e.

Pu T.T. ZOTHANSANGA : Pu Speaker, tawite in ka han sawi ve zawk teh ang. Kan member zahawm tak Dr.K.Beichhua rawn sawi pakhat, vawikhat session koh man hi a to lutuk a, hemi avanga emergency-a kan koh hi a tha lo a rawn tih lai tak kha. Nimina kan meeting-na ah khan Indian Constitution kan tih danglam avang khan session hi kan ko niin ka hria a, a remchan em avangin vawiin ah Ordinance-a kan lo neih tawh sa hi kan han pharh tel ve mai a ni. Vawiina kan issue vang hrim hrima session hi ko kan ni lo a ni tih kha ka sawi duh a. Tin, member zahawm tak Pu K.Sangthuama khan taxi lam unaute kha an thlavang a rawn hauh nasa hle in ka hria a, a awm ka ti a. Niminpiah khan Zozam chanchinbu-ah taxi permit issue dan kha an rawn tilang a, 2004 khan Transport Minister a ni em aw ka hre lo va, a niin ka hria a, 2004 kum ringawt khan 3600 vel an issue a ni. Tichuan 2005-ah khan 400 vel issue a ni bawk a, Mizorama kan taxi zawng zawng hi ama hun laia issue a nih chuan an thlavang chu hauh na ve tur pawh a ni lawm ni ka ti deuh a ni.

Tin, sumdawng leh private motor khairual kha an rawn sawi nasa khawp mai a, state dangah khawi hmunah mah hian an khai rual ngai lo, hei hi lo zir Chiang hram se ka duh a, a inang thei lo reng reng. Tin, ordinance hi Legislator te palzutna a ni tih hi kei chu a nih ka ring lova, India ramah pawh hian a awm fo thin a ni. Central-ah pawh khuan a awm thin a. Session inkarah hian tul bik thilte a lo awm a, chumi avang chuan tam takah chuan Assembly Committee- te pawh kan nei a, thil tul bikah ordinance tih ngai hi tam tak a awm ve thin a. Chu chu India ram Parliament-ah meuh pawh hian a awm thin. Chuvangin, Parliament-a an tih khuan M.P te palzutna a ni an ti ngai lo reng reng. Chuvangin, vawiina ordinance-a kan rawn ken pawh khan kan sorkar in, kan state in mipuite tan a tha a ti a, kan session a la hun si lo a, chuvangin hei hi ti phawt ila, member zahawm tak tak ten an approve leh turin Assembly – ah i pharh leh ang u hmiang an tihna avanga heta lo awm tawh hi a ni a, membrete kan inpalzut lo a ni tih kha mipuiten min lo hriatsak hram ula ka han ti bawk a ni.

Tin, bus replacement thar tak tak ka hmu a tih te pawh kha a dik ka ring, engemaw hun lai khan replacement han phal zawk hun lai kha a awmin ka hria a, khalai ami te khan an lo ti a nih chuan a thar tur a ni a. Tin, replacement a nih hrim hrim chuan a bus kha chu a thar tur a ni, a hluia rawn replace thu a awm lo reng reng, kha kha min lo chhinchhiah tel sela. Tin, tunlaih hian taxi thar kan issue lo in ti a, MZ 01 J te, K te a awm fo mai si a tih kha Facebook ah te leh kan opposition ten an sawi fo mai bawk a. Hei hi kan rilrua kan hriat tur chu Aizawl DTO hnuaiah hian Seling te, Saitual te, Thingsulthliah te an awm a, anni hian MZ 01 hi an hman ve vek a ni. Amaherawhchu, Aizawl khawpui chhungah hian kan issue lo kan tih hian khinglai tlangah chuan kan issue a ngai tho thin a. Anni khan MZ 01 hman tho khan J te, K te an rawn ni ta a, kha mi avang khan Aizawl chhungah hian kan issue ve a ni chuang lo, hei hi mipuiin min lo hriat sak kan duh. J te, K te a awm a, hotuten tute

emaw in lo pe ru a ni ang ti a han inchhuahchhalh te a awm deuh fo mai a, khalai te kha ka'n sawi fiah bawk a nih chu.

Vawiinah hian sawi tur tam tak a awm a, mipui kan thuhmun vek thei lova, transport leh transport lo te han hrut rual tak tak kha chu anmahni pawhrawn sorkar se an ti miah lo ang, kha kha chu thil chiangsa a ni. Vehicle Act-ah te pawh khan han ti ila a rual thei lo reng reng, khawi hmun pawh en ula. Helaiyah mipuiin a dan chungchang thil tam tak kan sawi lan lohna ah niawm taka lang hi kan sawi vak vak ringawt a, a taka han tih dawna anni pawhin an tih hauh loh tur hi an sawi leh vak thin a, hetiang hi ram hruaitute hian i ti tam lo ang u tih kha ka sawi duh a ni. Ka lawm e.

SPEAKER : Awle, kan duhtawk tawh mai dawn a ni awm e. Col.Z.S.Zuala'n rawn sawi leh sela.

Lt. COL. Z.S. ZUALA : Pu Speaker, ka lawm e. An han sawi an han sawi takah chuan sawi tur engemaw a awm zui zelin ka hria a, kan opposition party lam han sawi atang te khan thil tam tak kan zir chhuak a. Tax pek lampang hi kan hotute hian kan encourage lo niin ka hria a, tax pun leh tihdanglam hi kan ngaithei lo hle niin ka hria an sawi atang khan. Economics independent kan puang ang te kha an tiin ka hria a, kha lampang hawi zawnga hma han lakna hi an ngaithei lo leh deuh em maw ni? Tin, replacement hi a tul hle in ka hria a, public vehicle a nih ang hian motor hi a tha tur a ni. Hman deuh khan kan thenawm nu hi hetilai chhukah hian bus hluiin a chil a kawnglaiah a chil pherh deuh thaw a ni. A bus kha a hlui lutuk a, engemaw kawng zawngah chuan replacement tih hi tha turah ngai ila.

Tin, intlanchhawk tih te pawh hi keimahni pawh hian office kal dawn te pawh hian, 'kan thiante motor – ah hian combine in i kal ang u', te ti ila. Example show tur awma ka ngaihte hian kan hreh viau niin a lang a. Chuvangin mipuite hi chu hetiang lamah hian kan zirtir thei dawn lo niin a lang a. Mahni hian hma la ila, office te hi ke in han kal ta ila, midang tam tak kal an awm mai ang. Chutiang bawkin gas subsidy te pawh Central Minister khan hmanah khan subsidy surrender turin min rawn request a. Hengte hi surrender tura in sawm pawh a ngai lo, keini ho hi chuan automatic in subsidy hi chu kan la lo tawp mai tura ka ngaih lai khan a then hi chuan kan ti chak lo viau niin a lang a. Public leader te kan intih chuan hetiang lampang hi kan tih tur pawh niin a lang a.

Tin, intlanchhawk te pawh hi taxi ringawt tih ai khan private motor intlan chhawk te kha kan tan theih chuan a tha a. Tin, thil pakhat han sawi kai leh ka duh chu hman deuh khan order a awm a, sun screen, motor car a hman loh tur tih kha a ni a. Tunah hian hei pawh hi hmanaw kan awm leh ta teuh mai a, a hmanaw ho zingah

hian keimahni public leader-te hlei hlei hi a ching te kan ni leh tawh, kan in en deuh chu a ngaiin ka hria a. An han sawi an han sawi takah chuan hengte hi ka rilruah a awm a, ka han sawi chhuak ve a ni e. Ka lawm e.

Pu P.C. ZORAM SANGLIANA : Pu Speaker, Ordinance-a lo chhuah tawh, India ram nghawng thil avanga emergency session koh ngaiiah Ordinance a thih dawn avangin he session-ah hian ngaihtuah kan ni tih hi House member te leh Mizoram mipuiten kan hriat sa ni mahse kan hriat nawn a tha in ka hria. A chhan chu Ordinance chhuah a nih chuan session hmasa berah House-ah putlulh ngei ngei tur a ni. Session pawimawh tak India ram pum huap, kan zavai atan malsawmna tur bill (ti ang aw) nimin lamah kan passed tawh a. Chumi chuan vawiinah he thil hi ngaihtuah ngaiin min han thlen ta a. Chutihlaiah chuan Pu Speaker, i chair kaltlang hian ngen duh ka nei a. Vawiina kan bill hi minrawn pek tirh atang khan ken vel hi an phurawm loh em em khawp a, a then legal, a then A4, heta tang hrim hrim hian hetiang hi ka ngaihtuahna-a awm dan chuan Assembly Sectt. hi department ten an zah lohna ah ka ngai hial a ni. Chuvangin, ni dang reng rengah billrawn puluttu tur tenrawn ti miah tawh lo sela tiin ka ngen e, en pawh a phurawm lo a ni. In ta theuh kha han en mah teh u, a then legal, a then A4, MLA prestige a khawih e chu ka ti em lova kei chuan, amaherawhchu, hetiang hi chu chin tawh loh ni se. Tun term ah hian session pawh vawi engemawzat kan la nei dawn, chung hunah te pawh kan Minister zahawm tak takte kaltlangin department ten bill leh thil chi hrang hrang anrawn thehlut leh ang, khawngaihtakin a wording tih vel te hi chu kan mithiam tak tak, kan Ukil ten an sawi turah ka dah a, kei teh lul in sawi dan tur ka thiam bawkw lova. Chungah te chuan heng ang zawkah te hian kan Assembly tih zahawm ve hi member te hian kan beisei a ni tih hi Pu Speaker, chair atanga i sawi tur awm tak a ni na a, ka'n sawi a ni.

A Bill chhung hrim hrimah hi chuan vawiinah hian kan ngaihdan inang lo thei a awm a, nimin lamah te kan sawi ang leh opposition lam leh kan House Leader pawh khan a sawiin ka hria a, thutna azir avanga tlema ngaihdan han dang thin hi chu a awm na a, a mi nawlpui hrim hrim hian kan khawpui Aizawl ah te hian lirthei te hi a lo pung chak chho ta a, engtinng kan enkawl ang? Chu lirthei tawt chu engtinng kan siam rem theih ang tih te kan rilruah a awm tih a Chiang tawh a. Chumi avang chuan hetiang thil a lo nih hian mi hi an alert, an conscious niin ka hre thin a. Chuvangin kan Transport Minister zahawm takin he Bill arawn putlulh leh a repeal-na thlenga arawn buatsaih te hi lawmawm ka ti tak zet zet a. Chutianga active taka mipuite nghawng thei thilah na na na hi chuan han practice nghal ngam mai zel, a tha lo a nih chuan withdraw leh mai ngam thin nih te hi kan tih tur ni fovin ka hria a.

Ama department chan tho a nih avangin han sawi tel zawk ka duh chu Pu Speaker, VIP ho kan ration neih ve thin te min han tih tawp sak vek a, amah kaltlangin ti mai ang kan han ti tawp a, Mizo miretheite hnena buhfai a kal hnem zia hi. Ama department chan ngei ngeiah pawh kan sawi thin, muster roll pawhin, (a thawk nghet chu sawi loh) chini 20 kgs. leh buhfai bag 1 nge quintal 1, chutah khawnvartui quota anga an lo neih ringawt an tih tawp vek avanga chhungtin fairel bela buhfai rawn tam ta, Chandigarh atangin, Punjab atanga a chah luh kha a tipung a ni hleinem, helaiah min multiply a ni. A dawngtute chu mipui vek an ni, vawiina hmalakna fing tak ni chho zelah card eng dawng ho bakah card var dawng te pawhin buhfai kan han la ta te pawh hi, quintal khat dawn dawn la ta te, 1 kg. ₹ 3/- lek ni si a phurh zawh sen loh te an ti a ni, a sawi uar deuh chuan. Chutianga malsawmna a lo thleng ang hian, a tirah han sawisel han sawisel mah ila an han in tlan chhawk mah ang a, hmana kan tih lawk pawh khan tha an ti em mai mipui khan, vawiinah pawh an han in tlan chawk ang a, awle, sorkar chuan a control theiha chu intiam thlapa, a form atang pawha intiam a, permit-a motor lei thei te hi sorkar in a control hmasak turte chu an ni. Kan ti tak tak em ka ti thin a, kan Chief Minister te, ka pu, nangmah ngei pawh hi taxi in rawn kal teh, kan zahawm phah sawt ang em aw, kei chu ka ring miah lo. Taxi khan nang rawn kal ta la, session chhung te hian i bungalow atangin pilot nen lo tlan si la, Speaker kha pilot nena lo tlan tur i ni si a, kan Chief Minister zin chhuak dawn se, kal chhuak dawn se, taxi in kal dawn ta se, pilot nen, guard nen, a thuum famkim nen lo kal si sela, in tehkhin awm leh awm lo te hi a awm a ni ka ti a ni.

Chuvangin Pu Speaker, vawiinah pawh hian kan Bill hi a clause by clause a sawi ngai ka ti lo, a principle a kan Minister a rawn dinna nia ka hriat chu kan kawng tih zauh ngaihna a awm tawh si lova, a chep si a, motor a pung zel si a, helai bawrah hian engtingge mipuite harsatna kan chhawk zangkhai theih ang tih ngaihtuahna a rawn kalpuina hi kei chuan ka appreciate a ni. Chuvangin vawiinah ordinance-a lo lut tawh session hmasa bera Dan a kan siam ngei ngei ngai a ni tih hi member ten hria ila. Vawiina ka lawmna em em chu opposition member zahawm tak te khan Pu Speaker, helaiah hian a word chumi khami a dik lova tih sawi tur awm miah lo, a ruling zawk mah mahin ka hma chiaha sawitu nen khan i vei lama thu te sawi awm zawk tak kan han sawi ri ta mah mah zawk a, chung chu engnge a chhan kan tih chuan he House chhungah hi chuan member te hian kan ram leh hnam tan, kan mipuite tan hian thahnem kan ngai tak zet zet a ni tih te hi a ti langin ka hria. Vawiinah pawh hian kan Minister zahawm takin 'The Mizoram Motor Vehicles, Taxation (Amendment) Bill, 2016' a rawn putluh hi pass pui a tha in ka rawn thlawp a ni e, ka lawm e.

Pu VANLALZAWMA : Pu Speaker ka lawm e. Kha member senior tak tak te leh experience nei tha tak tak ten an han sawi a,

ngaihthlak a nuamin a bengvarthlak a. Engemaw thenkhat kan thiante sawi loh han sawi lan ka duh chu, thil hi ka lo hre fuh chiah lo deuh emaw ni chu aw ka ti a. Life time tax, kum 15 chhung atana lak kan tih kan han sawi hot vel lai kha chuan all India-a hman tur a ni a, helaia lo tihdanglam ngawt theih pawh a ni lo ti khan kan inhrilhfiakh kan ka hre deuh a. Engpawhnise, hei kan lo ti danglam leh thei ta a, a lawmawm khawpin ka hria a, a bik takin transport vehicle lam te tan a ni a. Amaherawhchu, tah pawh hian ka lo hisap leh chu kan ti rau rau a nih chuan kan zavai atan hian ang khat hian kan kal leh mai dawn emaw ka lo ti deuh a, kum 15,10,5 tih laia kha, chu pawh chu kan lo la thliar sin leh a, private ho te chu a lo huam lo leh a. Khalai te kha kan ti danglam thei a nih rau rau si chuan engatinge maw a hma pawha kan hrut rual thap ang khan kan tih leh mai loh aw tih ka ngaihtuahnaah a awm nghal a. A chhan chu kan Transport Minister zahawm takin chutiang khatiang chuan kan ti dawn, a tih khan vai huap tur hi emaw ka lo ti ve ringawt a, mahse a lo ni leh lo lai te kha a finthlak ber em aw te ka ti a, tih rau rau chuan kan vaia hman tlan leh theih khan ti ta ila. Kan hre vekin ka ring a, kan hre tlang a, kum 15 atana chhiah han pek laia hi chanchinbuah te leh fakselna ah te pawh a lo lang a, kan bulah te pawh an sawi a, in bulah pawh an sawi ve in ka ring Pu Speaker. Tam tak hian chhiah pek hreh em em vang pawh nilovin kawng chhia nen hian an sawi zawm hram lehngal thin a, sawi zawm rem deuh a lo ni bawk si a. Kawng a chhe si, chhiah a tam si ti ang khan sawi hi a awm fo reng a ni.

Kan hria a, hmun dang deuha han kal hi chuan kawngpui tha deuha min tlan pui vak chuan a piah deuhah toll tax hi a lo awm ngei a, chuti takin a na lem lo, kawngpui tha deuha min tlan tir pur pur hnu a tax min lo thing a nih chuan. Mahse helaiah hi chuan kawng chhe zetah hian kan tlan kan tlan lo thei lova, tahchuan chhiah pek dawn nikhua ah kum 15 in pek nghal a ngai han tih laia te kha mihring rilru kha engemawni zawng hian a rawn khawih a, hengte pawh hi Pu Speaker, kan vai tana tih kha a harsa lutuk a nih loh chuan, kan tidanglam thei tho a nih si chuan engatinge kan tih mai loh aw tih kha kan sawi chhuak duh a, tih leh theih a ni em tih te kha ngaihtuahna ah a awm a.

Tin, ordinance-ah kan chhuah a, a hmanhmawh thlak kan ti a, a hmanhmawh thlak dan lai taka kha kei ka hrethiam leh lo deuh hlek a. A chhan chu Transport Union lam hovin an nawr kha kum 15 atana pe tawh sa vek an ni a, session hi an nghak mai thei lo em maw ni chu aw te ka ti deuh a. Session leh session inkara han tih rum rum tul lutuk tak a ni lo a ni lawm maw ni le tih te chu ka ngaihtuahna ah te chuan a awm deuh a.

Tin, Pu Speaker, kan Minister zahawm tak khan a sawi a, an lawm khawp mai a ti a. Mahse nichina Er. Lalrinawma'n a rawn chhiar lehkha kha a copy ka kawl ve a, tahchuan an lo lawm lo viau ni awm tak te hian ka hria a. I remtihna in kan

chhiar lawk ang a, a chhiar loh portion kha “Ni 30 leh 31 August 2016-ah Mizoram Governor in Mizoram Legislative Special Assembly thutkhawm a koh ah hian keini taxi, sumo leh auto rickshaw te tana thu lungchhiatthlak tak mai life time tax chungchang hi House a putluh a pass tum niin kan hria a. Hei hi Aizawl Taxi Workers Union chuan tha a ti lo tak zet a” ti in thuhmahruai hi an rawn tan a. Khalai te kha tha an lo ti lo viau tak tak em maw ni aw te ka ti a. Mahse hetia ziak meuha kan MLA zahawm tak te an pe a nih kha chuan thutling a ni lo thei lo a. Chulai te pawh chu engtingge ni kan in dawr? An lawm viau emaw kan tihlai te khan, kei pawhin an lawm viau emaw ka tih lai te khan tihian thu a lo kal leh a. Chung te pawh chu vawiin ah kan Minister zahawm tak khan engtingge a lo dawnsawn ka hrethiam lova, nakinah a sawi fiah thei chuan ka ring a. Tin, khatia kum nga emaw, kum sawm, sawmpanga, a khawl deuha tax han pek theih kha tam tak hi chu an lawm tih kha chu a hriat tho a. Mahse kum sawmpanga em em lai hi chu a thui lutuk deuh a, chutih mek lai chuan helaia han sawi kai leh theih tho a nih ka ring a, motor chungchang kan sawi kan sawi a. Sun control te pawh kha kan strict lai khan kan han strict vak a, tunah chuan an bel chho leh ta a, heng te pawh hi thil pawl lutukah kei chuan ka ngai lova.

Chutih mek lai chuan insurance lampang te hi kan sorkar tih theih a ni em ka hre lova. Kum tin mai insure tih lai hi lehlamah chuan a buaithlak angreng khawp mai a. Heng te pawh hi a duh tan chuan kum nga thleng te pawh pek theiha siam theih dan hi awm ta se chuan a tha awm mang e aw tih te hi ngaihtuahna ah chuan a awm a, Pu Speaker. A chhan chu motor insured loh buaithlakzia leh a hlauhawm theihzia hi kan la hre tawk lo deuh ni te in ka hria a Mizoram ah hian. Kan motor insured lovin pawl a va khawih angah te hian kan in ngaidam leh mai thin zawk pawl a. A nihna takah chuan chawitaw tur kan ni zawk a, motor nei reng reng chuan insure zawk lai tak hi ngaih pawimawh a tul a. Transport vehicle kan nei emaw, private vehicle kan operate emaw, insure hi chu a pawimawh lutuk. A chhan chu engemaw pawl te a lo va khawih palh chuan, nunna te a lo va lak hlauh chuan, a lo insure lo a nih kha chuan a chawitu tur kha keimahni kan ni a, heng zawk te pawl hi in zirtir ila. Tin, kum khat mai lo deuh , advance deuh a insurance pek theih dan hi awm se chuan kan thatpui awm mang e aw tih te hi ka ngaihtuah a. Dik tak chuan a road tax te hi kan lo pe lo a nih pawhin a hnu ah penalty te nen kan han pe leh a, sorkar pawl a lo hlawk deuh dan te kha a lo awm zel a. Insurance zawk hi kan hotute, kan Minister zahawm tak te pawl hian ngaihtuahna hmangin tih dan a awm em? A theih miah loh emaw kan tih te pawl kha kan lo ti danglam thei mek baw si a tih kha Pu Speaker, vawinah ka'n sawi duh a.

Tichuan, motor vehicle chungchang hrim hrim hi motor te a lo tam ta a, sawi tur hi a tam em em khawp mai a. Pollution control chungchang ringawt te pawl hi sawi kai ta lawk ila. Hei Aizawl-ah te pawl kan hmu a, thingtlangah te pawl han kal ila kan hmu a, motor khu lutuk te hi chu a tam lo a ni. Mahse chutih mek lai chuan

kan zavaia tih tur anga han in nawr leh vak vak lai te hi a titu lam te pawh hian kan tlin leh loh thleng thleng te pawh hian kan ti leh a. Chutih lain a khu nasa ho kha chu hel- na zawng hian an lo biru a, an check lai ten an lo tlan tha duh lova, an lo tlan chuak leh a, tikhan buaina hi kan nei zauh zauh a. Tin, pollution control lam tan pawh buaithlak kha a awm a. Hengah te hian ngaihtuahna hman thiam a, a vai nawlpui lo deuha a khu kha chhinchhiah a, strict deuha duty te nen tih dan kha a awm em? Chutilo chu motor thar tak tak te nen khatia check a va ngaih vek khan min tibuai lutuk a, tul lovah hian kan va buai ni te khan a lang a. Chutiang chiah chuan nichina kan hotute pawhin an sawi zawk sun control chungchang te pawh kha Supreme Court ruling a ni e kan ti a, khawng em em in kan han kengkawh a. Amaherawhchu kha Supreme Court ruling kha va bawhchhiat a thiltih kha chu thil thianga pawh a ni lova, tih tur pawh a ni lova. Amaherawhchu khatiang em em lo deuh khan a tih theih a ni, Mizoram context atang hian han en ta ila tih kha vawiinah transport chungchangte kan sawi lai hian Pu Speaker, kan sawi ri ve duh a ni. Ka lawm e

S P E A K E R : Sawi duh dang kan awm tawh lo a ni awm e. Tichuan kan Minister zahawm tak kan sawm tawh mai ang a, aman sawihona a khaikhawm ang a, inhrilhfiah ngai te a awm chuan a hrilhfiah ang a, chumi zawhah chuan pass rawn dil nghal mai se a tha awm e.

PU JOHN ROTLUANGLIANA, MINISTER : Pu Speaker, ka lawm e. Hrilhfiah tur leh sawifiah ngai kha a tam hmel angreng a, kan Bill pawn lamah khan kan tui zawkin ka hria a Pu Speaker, demand kan sawi ta emaw ni chu aw ka ti a, kan sawi teuh mai a. Engpawhnise, thahnem kan ngai tlang a, a lawmawm a.

A hmasain ordinance kan siam nachhan hi a hmanhmawhthlak viau em maw ni le an ti a. Tin, a then te phei chuan member te zahawmna in palzutna a ni te kha kan ti lek lek a. Ordinance hi dan bawhchhe miah lova siam a ni, member te in palzutna a awm lo a ni tih kha ka sawi hmasa duh a. Tin, Commercial Vehicle Joint Action Committee ten in hriat ang khan harsatna nasa tak an siam ve a, bandh te an siam a, an strike a. Chuvangin life time tax hi installment-in min pek tir rawh u min ti a. Chutiang chuan anmahni rawtna zulzuiin hman vat a tul avangin ordinance hi siam a ni. Tin, hei hi tihdanglam theih a ni lo, Central lam rawn tih a ni kan tih kha a dik a, kum 15 life time tax kha chu kan tidanglam chuang lo, mode of payment lam kha kan tidanglam a ni tih kha ka'n sawi lang duh bawk a.

Tin, tax pek dawn chuan kum 10-ah motor a tha mang lo kan ti a, replacement dawn chuan kum 10-ah khan a la tha hle mai bawk si a, hriatthiam a har khawp mai. MZ-01 te pawh kha replace dawn chuan a la tha hle mai a, mahse tax pek dawn chuan kum sawm kha kan nei tha meuh hlawm lo kha a ni bawk si a. Engpawhnise Pu Speaker, replacement chungchang hi chu thu la mu mek a ni a,

engmah final a la awm lova, kan STA ten rawtna an siam mek chauh a ni. Tichuan, intlanchhawk chungchang-ah pheh hi chuan Pu Speaker, kan department chan a ni lova. Hei hi traffic management committee a hranpa in a awm a, chutah chuan kan Home Minister zahawm tak hi Chiarman a ni a, anni ho a tih a ni a. Chuvangin keini chuan mawh kan phur ve lem lo a ni tih kha ka han sawi lang duh a. Tin, private te nena tihruah vek mai awm tih lai kha sawi kha chuan a awm mai, mahse Pu Speaker, motor kan neih nachhan hi a inang lova. Commercial vehicle a nih chuan miten loan te an la a, inhlawh tur ten eizawn nan an hmang a ni. Tin, private te hi chu a nihna takah chuan kan khawsak han nawm deuh nan te leh kan khawsak awlsamna atana nei kan ni tlangpui bawk a. Chuvangin anni kha commercial vehicle kan tih zingah an tel ve lova, chuvangin a chawhrual vek theih lem loh a ni. Tin, a thenin thla thum ten an pe a, a then in thla ruk ten a pe a an ti a. Commercial vehicle vawiina hetilaia kan han sawi bik hi chu taxi te, autorickshaw te leh maxi cab te hi an ni a. Trucuk te, bus lam te hi a tel ve lo a ni tih kha Pu Speaker, ka han sawi lang duh a. Hengho hi chu keimahni state in pek tura kan tih ang khan tunah hian an la pe ve mek a ni. Tin, Pu Rinthangan pickup private a registration tih ka tum a, an phal lo a tih kha, pickup hrim hrim motor hi commercial vehicle a ni. Tin, private in truck ka lei a, ka hmang dawn a, private in registration ka duh a ni tih kha a inang reng a, a theih loh, kha kha min lo hriatsak sela.

Nichina member zahawm takin a rawn sawi Aizawl-ah taxi thar in pe em ni an ti a. Keipawh hi WhatsApp-in min rawn thawn fo thin a. MZ O1 M tih te pawh a awm an ti a, taxi nen te a thla an la a, min rawn thawn thin a. Hei hi Aizawl taxi permit hi kan pe lo va, nichina member zahawm tak Pu T.T.Zothansangan a sawi ang khan Aizawl-a registration ti si, Aizawl pawn ami taxi kan pek te khan MZ O1 in registration an rawn ti a ni. Ka bialah Lengpui te pawh khu Aizawl district-ah MZ O1-a registration rawn ti an ni a. Chutiangin khithlai Thingsulthliah te, Seling te, Saitual te, khatiang ho kha MZ O1 khan an rawn register a. Mahse tunah chuan an motor kawngkharah Saitual taxi, Lengpui taxi tih ziah vek tawh tur kan ti a ni. Chutiang chuan thenkhatte tan ngaihsual palh theih a awm avang khan kan han sawifiah duh a.

Member zahawm tak Pu Zawma'n a rawn sawi kha Aizawl Taxi Worker Union te hi an va lungawi si lo ve tih lai kha. He mite pawl hi pawl ding thar a ni a, keini chuan heng kan siam lai hian kan la hmehhriat lo a ni. Chuvangin anni hian tuna kan session dawna lehkha min pek kha an pawl hming kan hriat ve na chauh a ni. Tin, motor khu vak vak chungchang pheh kha chu Pollution Control ho kut a ni a, kan bill-ah hian a tel lo bawk a, sawi fiah lo mai ang.

Tichuan, Pu Beichhua khan a rawn sawi a, kan Principle Act –ah hian a lang lo, chumi khami chu, 4A tih vel a rawn sawi kha kan lo en a. Engpawhnise, kan thil sem kha a lo dik lo deuh a, kan Main Act hi 2nd Edition 2011 a lo ni a, a lo in mil

lo a ni. Chuvangin, 2015 kha amendment kan nei tawh a, khami 2015 bu kha member zahawm tak tak te kan session zawhah hian pek theih an ni tih kha kan sawi lang tel nghal a ni. (Interruption)

Dr.K.BEICHHUA : Pu Speaker, point of interruption khawngaih takin. Kha kha tunah hian kan hmu mai thei si lova. Operating tih te, Schedule 3 awm lo te, Section 4A tih te kha he House zahawm tak ah a awm ngei tih assurance min pe thei em le ? (Minister : A awm ngei e) Chutilochuan, amendment ni lovin reconstruction a ang tlat alawm le, Pu Speaker.

Pu JOHN ROTLUANGLIANA, MINISTER : Aw, Principle Act-a 4A awm lo hi amendment 2015 page 3-ah khan a awm a ni. 2015 copy kha kan rawn pek hunah che u Pu Speaker, a chiang mai ang, tihsual palh a ni.

Pu LALRUATKIMA : Pu Speaker, khawngaihin, ni e, kha tihsual palh lianpui mai kha a awm a. Min misguide thei ang tur thil zawk kha a ni a. Principle Act hlui zawk min lo sem kha a pawl khawp mai a, tun hnu ah chuan thleng tawh lo se a tha khawp mai. A hma kar kalta khan min rawn pe a. Kan in buatsaihna nen a in mil lo tlat.

Pu R.ROMAWIA, MINISTER : Pu Speaker, hetiang thil a awm theih avang hian member te hian kan lo pass ngei tawh dan te pawh hi in lamah kan lo kawl that loh avangin Bill thar ang emaw, amendment emaw a lo luh hian a reference atan a hlui kan in dap peih tawh lo hi department lamah a hlui kha rawn chilh tel teh u, tiin he House ngei hian kan duh ang khan department ten an rawn ti ta thin a ni a. Hei tuna Dan, chilh tela a awm ve lo kan tih pawh hi vawiina thu ho tho in kan Dan pass vek kha a ni a, amendment 2015 kha. Chumi chu kan zuk dap chhuak peih tawh si lo va. Hei hi min rawn pe dik ta lo a nih pawhin zuk in dap chhuak peih ila chu 2015 amendment kha kan kawl vek ang. Chuvangin, chuti taka buai tur a ni lo va, a leh lamah kan official te mawng kan hlim chauh pawh a ni lo va, keimahni mawng pawh kan hlim tel ve a ni. Kan lo pass ngei tawh te pawh hi kan chiang lo tlang a ni ber a. Chuvangin, thil i in hrethiam tawn ang u tih kha ka rawn sawi duh a ni.

Pu JOHN ROTLUANGLIANA, MINISTER : Pu Speaker, a lawmawm e. Ni e, kan lo sem sual palh a, keini pawhin pawl kan ti a. Chuvangin, session zawhah 2015-a kan amend tawh kha chu kan pe leh vek thei ang tih member te kan hriattir a ni e.

Tichuan, kan tax khawn danah hian a then a inang lo tih nichina an sawilan rual khan,TDC meeting(Transport Development Council meeting) hi state zawng zawng atanga Minister te kal khawm meeting a ni a. Chuvangin, a hranpaa

Executive Order rawn siam tawh lovin, he meeting a kan thu pass hi state tin ten lo bawhzui a, lo hman nghal tur ti a order a awm avangin kha zawka kha kan rawn hmang a, khami zul zui khan tax hi kan la a. Chuvangin kan motor lian ho truck te, bus te a tel ve lo a ni tih kha ka sawi nawn leh duh a.

Tin, kan rawn amend nachhan kha, nichinah khan kan senior member zahawm tak Pu Sangthuama khan kum 5, kum 5, kum 5 a ti a. Kum 15 motor a tha si lo va a ti a, chuvangin an motor kha kum 10-a a chhiat kha chuan kum 15 kha va pek kher a ngai tawh lo. Kum 5 an pe ang a, kum 5 hnu ah kum 5 dang an pe leh ang a. Chuta a motor a chhiat tawh chuan pek leh a ngai tawh lo an off road tawh chuan. Tin, chumi rual rual chuan motor hlui kha a lo nei a nih chuan life time tax pe si lo, instalment pawh pe si lo, kum 2-a a lo upat tawh chuan kum 3 chhung a pe phawt ang. Chumi hnu ah kum 5 dang a pe leh ang, chumi zawhah a la that chuan kum 5 dang a pe leh ang. Kum 7 a lo nih tawh chuan a 2nd instalment zawk kum 3 te kha a pe leh ang. Tichuan, a last installment kum 5 kha a pe leh ang. Chutiang chuan instalment-a pekna tur hian ruahmanna kan rawn siam a ni.

Member zahawm tak tak ten an sawi zawng zawng kha kan chhang vek dawn a nih chuan kan chan loh thleng thleng kha a tam ang reng a. Chuvangchuan, kan Bill chhung deuh chauh kha ka han sawi a ni a. Engpawhnise, Pu Speaker, vawiinah hian kan sawi tak ang khan kan ordinance hi thla 6 chauh a hman theih avang leh hetilalah House-ah session a lo awm chhonzawm baw si avangin hetah hian Bill in kan rawn pulut a ni a. Chuvangin, ‘The Mizoram Motor Vehicles Taxation (Amendment) Bill, 2016’ kan rawn buatsaih hi khawngaih taka he House zahawm tak hian lungrual taka min pass pui turin ka han sawm a ni e, ka lawm e.

S P E A K E R : Minister zahawm takin Amendment Bill hi pass pui turin House a ngen a. Remti leh ti lo kha kan han buk leh dawn a. Remti lo kan awm em kan ti a ‘awm’, ‘awm lo’ ti kan awm si loh chuan ‘lungrual taka pass a ni’ kan ti leh mai dawn a. Chuvang chuan, kha kha lungrual taka tih kha nakinah sawisel tawh loh tur kan ti a ni ang chu.

Tunah hian kan buk tur chu “The Mizoram Motor Vehicles Taxation (Amendment) Bill, 2016” hi Minister zahawm takin pass a rawn dil a. Pass remti zawngin ‘remti’ ti rawh u le. (Remti). Remti lo kan awm em? Kan awm loh chuan he Bill hi lungrual taka pass a ni tih ka puang e.

Pu JOHN ROTLUANGLIANA, MINISTER : Pu Speaker, ka lawm e.

S P E A K E R : Awle, he House zahawm takin a hriat angin tun tum session hi 7th Assembly-a session vawi 10-na a ni a. GST chungchanga Indian Constitution Amendment vawi 122-na kan state-in pawmpui a lo ngaih ve avangin Emergency Session hi koh a ni a. Emergency Session a nih avangin zawhna leh chhanna hun kan nei lo a ni. Ni 24.8.2016 khan Business Advisory Committee thukhawm chuan programme hi a lo duang a, ni hnih chhung awh tura duan a ni.

Tun tum kan session-a kan hnathawh dan tlangpui chu hetiang hi a ni: -

Official Resolution 1 adopt a ni a. Sorkar Bill 2- Transport Department leh Public Works Department Bill passed a ni. Paper 7 House Table-a laid a ni a. Committee hrang hrang Report 4 present a ni bawk. Election to Financial Committees 3-PAC, Estimates Committee leh COPU te an term a tawp tawh avangin committee member thlan thar an ni bawk.

Hengte hi kan hnathawh tlangpuite an ni a, heta tlem han tarlan ka duh ve chu tun tum kan sorkar neih lai mek hian hna an lo thawk ve nasa a ni. Sorkar Bill pawh hi tun 7th Assembly chhung hian 37 lai kan lo passed hman tawh a ni tih he House hi ka'n hrilh duh a. Sorkar Bill leh Rules House-a sawiho tur hi eng hunah pawh Assembly Secretary hi kan rawn thei reng a ni. Bill leh Rules House-a sawiho tur nei chuan eng hunah pawh rawn submit theih a ni tih kan inhriattir a ni e. (Dr. K. Beichhua : Pu Speaker, khawngaihtakin, Special Mention a Pu L.C.Lalromawia s/o L.C. Tialchunga, Sihatla Lunglei Jail-a a thih chungchang Special Mention tura ka dil che kha min phalsakin ka hria a. I mangnghlih deuh emaw ni aw) Phalsak lo. Ka phalsak lo che. Ka phalsak che chuan phalna ka rawn pe dawn che alawm. Hei hi House zahawm takin a hriat tur chu Special Mention kan tih te, Zero Hour tih te hi thil thleng kha recently occurrence tih a ni a, a Parliamentary words in, chu recently occurrence tih chu before the matters become publicly known tih a ni. Mipui vantlangin an hriat hmaa thil thleng, entirnan, nizan leh tukin inkara thil thleng kha lo ni ta sela. Khatiang kha Special Mention emaw, Zero Hour-ah emaw kan mention thin a. Entirnan, S.Hlimen leimin avanga mi 60 lai an thih khan, an thi tih kan hriat kha zingkar a ni. Chu veleh Chairman hnenah ka kal a, Special Mention ka dil a, a lo phal a. Chu, tlang hriat a nih hma khan, House-in a hriat hma khan, MP ten kan hriat hma khan Special Mention ka siam a. Chu chu sorkar pawhin a ngai pawimawh a ni. Tuna Special Mention i rawn dil kha ni 20-a thil thleng a ni a. Nimin a nih kha chuan ni 10 a kal tawh. Sawi dan pangngaiin sawi ta ila, mi zawng zawng hriat a lo ni tawh. Khatiang kha chu Special Mention siam dawn ta ila siam tur a tam lutuk dawn a, churang chuan i hriatthiamna kan mamawh a ni.

Aw le, tun tuma kan session chu Pathian hruaina-in tuang takin kan zo leh ta a. Tunah chuan tiam chin awm lovin he session hi tih tawp rih a ni. The sitting is adjourned Sine die.

The House is adjourned Sine die at 12:15 PM.